



REPUBLIKA E KOSOVËS/REPUBLIKA KOSOVA  
GJYKATA THEMELORE PRIZREN

Numri i lëndës: 2024:073767  
Datë: 19.10.2024  
Numri i dokumentit: 06323148

C.nr.1400/2024

GJYKATA THEMELORE NË PRIZREN, Departamenti i Përgjithshëm-Divizioni Civil, gjyqtari Uran Zogaj, në çështjen juridike kontestimore të paditësit E.R. nga Prizreni, të cilin me autorizim e përfaqëson Shoqëria e Avokatëve: Studio Ligjore & Financiare “Klinaku .....” nga Prishtina, kundër të paditurës Sh.S.K.U.K. – Spitali Rajonal në Prizren, me objekt të kontestit kompensimi i pagës shtesë për ditët e punës gjatë vikendeve dhe rrezikshmërisë, jashtë seancës gjyqësore, më datë 18.10.2024, mori këtë:

A K T V E N D I M

HEDHET POSHTË si e palejueshme padia C.nr.1400/2024 e datës 29.02.2024, parashtuar nga paditësi E.R. nga Prizreni, kundër të paditurës Sh.S.K.U.K. – Spitali Rajonal në Prizren, për shkak të kompensimit të pagës shtesë për ditët e punës gjatë vikendeve dhe rrezikshmërisë.

A r s y e t i m

Paditësi E.R. nga Prizreni, të cilin me autorizim e përfaqëson Shoqëria e Avokatëve: Studio Ligjore & Financiare “Klinaku .....” nga Prishtina, pranë kësaj gjykate ka parashtuar padinë, kundër të paditurës Sh.S.K.U.K. – Spitali Rajonal në Prizren, me objekt të kontestit kompensimi i pagës shtesë për ditët e punës gjatë vikendeve dhe rrezikshmërisë.

Me aktvendimin e kësaj gjykate C.nr.1400/2024 e datës 05.07.2024, gjykata ka ftuar paditësin, përkatësisht të autorizuarin e tij që brenda afatit prej 3 (tre) ditësh nga pranimi i këtij aktvendimi të përcaktoj në mënyrë të qartë dhe konkrete kërkesëpadinë, përkatësisht të përcaktoj saktë dhe konkretisht vlerën e kompensimit lidhur me pagën shtesë për ditët e punës gjatë vikendeve dhe rrezikshmërisë, me paralajmërimin e pasojave që nëse nuk vepron sipas detyrimit dhe afatit të përcaktuar në pikën nën I. të aktvendimit C.nr.1400/2024 e datës 05.07.2024, padia do të konsiderohet e tërhequr, ndërsa në qoftë se padia do kthehej pa u korrigjuar, gjegjësisht pa u plotësuar, do të hedhet poshtë.

Me parashtresën e datës 12.07.2024, i autorizuari i paditësit ka deklaruar se lidhur me këtë çështje juridike nuk mund ta bëjë precizimin dhe saktësimin e kërkesëpadisë dhe nuk mund ta përcaktojë periudhën kohore lidhur me kompensimin e pagës shtesë për ditët e punës gjatë vikendeve dhe rrezikshmërisë. Po ashtu, përmes kësaj parashtrese ka deklaruar se në padi kanë propozuar ekspertizë financiare me qëllimit të vërtetimit të lartësisë së kërkesëpadisë dhe se një propozim të tillë do ta paraqesin pas pranimi të përgjigjes në padi dhe gjatë seancës përgatitore. Andaj, nga këto arsye nuk mund ta përcaktojnë lartësinë e kërkesëpadisë dhe periudhën kohore për të cilën kërkohet kompensimi i kërkesave sipas kërkesëpadisë.

Në këtë drejtim, gjykata ka ardhur në përfundim se padia e paditësit duhet të hedhet poshtë, në përputhje me nenin 102 par. 3 të LPK-së lidhur me nenin 253 par. 1 pika a) dhe f) dhe 99 par. 2 të LPK-së, pasi që paditësi nuk ka vepruar sipas aktvendimit C.nr.1400/2024 e datës 05.07.2024, përkatësisht nuk ka vepruar sipas detyrimeve të specifikuara në këtë aktvendim.

Më konkretisht, në nenin 253 par. 1 pika a) të LPK-së, shprehimisht përcaktohet që “padia duhet të përmbajë kërkesën e caktuar në pikëpamje të çështjes kryesore dhe kërkesave aksesore dhe të dhënat e tjera që duhet t’i ketë çdo parashtrësë (neni 99 i këtij ligji)”. Pastaj, sipas nenit 99 par. 2 të LPK-së, shprehimisht përcaktohet që “parashtrësata duhet të jenë të kuptueshme dhe të përmbajnë çdo gjë që nevojitet dhe e mundëson veprimin sipas tyre. Ato duhet të përmbajnë sidomos: emrin e gjykatës, emrin dhe mbiemrin (emërtimin e personit juridik), vendbanimin apo vendqëndrimin (selinë e personit juridik) e palëve, të përfaqësuesve të tyre ligjor apo me prokurë, po që se i kanë, objektin e kontestit, përmbajtjen e deklaratës dhe firmën e parashtruesit”. Së këndejmi, gjykata vlerëson se kërkesa e palës paditëse duhet të ketë një përmbajtje të caktuar dhe konkrete, në aspektin e periudhës konkrete për të cilën kërkohet një e drejtë dhe shumës përkatëse të kësaj të drejte. Pra, në bazë të dispozitës ligjore të theksuar më lartë, gjykata vlerëson se kërkesëpadia e paditësit duhet të jetë në mënyrë konkrete e caktuar dhe precizuar saktë, në mënyrë që gjykata të mund të procedojë sipas padisë. Gjithashtu, gjykata vlerëson se pala paditëse ka pasur mundësi që me rastin e parashtrimit të padisë të përcaktojë periudhën kohore të kompensimit të kërkesave të theksuara në padi dhe shumën e këtyre kërkesave, pa pasur nevojë që të kërkohen prova shtesë të theksuara në parashtrësën e datës 12.07.2024. Andaj, gjykata gjen se kërkesëpadia e caktuar dhe precizuar është kusht i domosdoshëm i padisë dhe në rast të mospërmbushjes së këtij kushti, padia duhet të hedhet poshtë.

Në vazhdim, në nenin 102 par. 3 të LPK-së thuhet që “do të konsiderohet se është tërhequr parashtrësata po që se nuk i kthehet gjykatës brenda afatit të caktuar, e në qoftë se i kthehet pa u korrigjuar, gjegjësisht pa u plotësuar, parashtrësata do të hidhet poshtë”. Në anën tjetër, me aktvendimin C.nr.1400/2024 e datës 05.07.2024, pala paditëse në mënyrë të qartë, konkrete dhe specifike është udhëzuar për plotësimet dhe korrigjimet të cilat duhet të bëhen në padinë C.nr.1400/2024 e datës 29.02.2024, mirëpo e njëjta përmes parashtrësës të datës 12.07.2024, gjykatës padinë ia ka kthyer pa e plotësuar apo korrigjuar sipas detyrimeve dhe kërkesave të aktvendimit në fjalë.

Në këtë drejtim, gjykata vë në dukje faktin se është pikërisht pala paditëse që duhet të caktojë e precizojë kërkesën e saj në kuadër të padisë, të cilën gjë pala paditëse ka dështuar ta bëjë.

Andaj, pasi që në përputhje me nenin 171 par. 1 të LPK-së gjykata është e lidhur me aktvendimet e saj, vendosi që padia e paditëses të hedhet poshtë.

Nga se u tha më lartë, konform dispozitave ligjore të parapara me nenin 99 par. 2, 102 par. 3, 253 par. 1 dhe 387 të LPK-së, u vendos si në dispozitiv të këtij aktvendimi.

GJYKATA THEMELORE NË PRIZREN  
Departamenti i Përgjithshëm-Divizioni Civil  
C.nr.1400/2024, datë 18.10.2024

Gj y q t a r i  
Uran Zogaj

KËSHILLË JURIDIKE: Kundër këtij aktvendimi është e lejuar ankesa, në afat prej 7 ditësh, nga dita e pranimit të të njëjtit, Gjykatës së Apelit në Prishtinë, përmes kësaj Gjykate Themelore.